

陶澍年谱（节录）

王焕镛著 薛英标点

编者按：《陶澍年谱》二卷，王焕镛撰，原题《陶文毅公年谱》，现改题今名，卷数仍旧。原书油印本，迄未刊行，北图所藏，即著者所捐赠。全书约四万余字，现按年节录其主要内容，披露于下，供研究陶澍之生平事迹参考。

陶澍自道光五年五月调江苏巡抚，十年六月署两江总督，至十九年六月去世，正如王焕镛先生跋文所说：“创海运，修水利，倡票盐”，总之，是在漕运、水利、盐政方面为清王朝作了不少的工作，而这一些也正是清王朝的重要经济命脉，陶谱中所记录的当时情况，作为研究中晚清漕运等方面的资料，还是有一定价值的。另外，解放前的南京国学图书馆（今南京图书馆）就是陶澍晚年所建的惜阴书舍，至今犹存，也是值得人们怀念的事。

卷 上

公讳澍，姓陶氏，字子霖，又字云汀，晚岁号髯樵，又号桃花渔者。湖南长沙府安化县人。

陶氏先世出晋大司马桓公侃，及后唐同光间始居楚之安化。太高祖耀祖字伯舍，有幹略，多善施。高祖志凤，字翎先，接物以诚，和霭可亲。高祖妣彭氏。曾祖崇雅，字

文衡，性勤恣，多隐德。曾祖妣彭氏，有贤德，治家严肃有声。祖孝信，字寅亮，为人友爱和平，乐善推诚。祖妣李氏，慈惠和蔼，戚党咸敬爱之。考必铨，字士升，号莫江，廩膳生，以名德入祀乡贤祠。妣黄氏，讳翠兰，贤德有声。继母张氏，皆诒赠一品夫人。

清高宗乾隆四十三年戊戌十一月三十日公生。

乾隆四十四年己亥，二岁。

是岁大饥，道殍相望，莫江公倡义募钱瘞之，乃至亲役畚筑。

乾隆四十五年庚子，三岁。

是岁，莫江公授徒里中，于儒先传注之学甚勤。

乾隆四十六年辛丑，四岁。

七月二十五日未时，弟潜生，字子晋，号石潭。

乾隆四十七年壬寅，五岁。

三月，村有虎患，莫江公为文牒境内之神以驱之。

乾隆四十八年癸卯，六岁。

是岁，莫江公从余存吾、罗慎斋二先生游，咸爱重之。

乾隆四十九年甲辰，七岁。

是岁，莫江公食饩为廩膳生，公始随受书。

乾隆五十年乙巳，八岁。

是岁，随莫江公读于安化二都王氏。公少为文字即为前辈深许，莫江公喜，以忘其贫。

乾隆五十一年丙午，九岁。

三月十八日妹姍英生。（适安化周光炯晓斋）

乾隆五十二年丁未，十岁。

是岁，莫江公家居，岁歉益贫，诘屈之状，人所不堪。

乾隆五十三年戊申，十一岁。

乾隆五十四年己酉，十二岁。

是岁，随莫江公读于玉虎文上舍家，始学八股文，应弟子试。

乾隆五十五年庚申，十三岁。

是岁秋，莫江公为邑人邀，计修学校南塔。十一月十五日，祖母李太安人卒。十七日，母黄太夫人相继卒。有《圯思吟》，为同里王立堂先生叹赏，并赠以诗。

乾隆五十六年辛亥，十四岁。

是岁，莫江公寓学舍，督建南塔，尝徒步醵金，日数十里不少懈。逮冬，塔成，于是人文蒸蒸日上。时公随读学舍。莫江公有《始宿明伦堂》诗，盖其时督工之勤，拮据之状，于此诗可见。有《十五国风次序说》、《楮先生传》。

乾隆五十七年壬子，十五岁。

是岁起，随莫江公读于益阳曾筠斋先生家者三年。（先生名润攀）有拟李商隐、陆龟蒙《虱赋》。

乾隆五十九年甲寅，十七岁。

是岁冬，改葬祖母李太安人，祔于先祖墓。迁母黄安人柩于南竹山藏焉。

乾隆六十年乙卯，十八岁。

是岁，补邑诸生。九月，自益阳归。

仁宗嘉庆元年丙辰，十九岁。

是岁，随莫江公读于水月庵。

嘉庆二年丁巳，二十岁。

是岁，莫江公复馆益阳。

嘉庆三年戊午，二十一岁。

是岁，随莫江公读于石井刘静园先生家。冬，夫人黄氏德芬来归。

嘉庆四年己未，二十二岁。

是岁，莫江公仍馆石井刘氏。

嘉庆五年庚申，二十三岁。

二月初五日，女瑞姿生。（适湘潭周詒朴）

秋，举乡试。

嘉庆六年辛酉，二十四岁。

正月，客京师。六月，京师大雨，公有诗纪事。是岁，恩科会试未得隼，郁郁京都，乃鬻谢石之术以自给。

辑是岁诗，为《出山草》。女琼姿生，字梅霁。（适安化王育耀师璞）

嘉庆七年壬戌，二十五岁。

是岁，登进士第，改翰林院庶吉士。六月，莫江公病肿，危甚，诸医束手，有丐造门医治，咸以为神。九月，请假南归。冬，从兄兰江先生辑家谱稿成，乞莫江公讨定之。

嘉庆九年甲子，二十七岁。

二月，起假赴都，四月杪抵京。

嘉庆十年乙丑，二十八岁。

四月二十日，散馆引见，授职编修。闰六月初九日，丁莫江公忧，自京匍匐奔归。

是岁，辑壬戌至己丑诗为《玉堂草》。有《东巡赋》。

嘉庆十一年丙寅，二十九岁。

是岁，主讲澧阳书院。有《貽庆桥碑记》、《澧阳皮氏族谱序》。

嘉庆十二年丁卯，三十岁。

是岁，仍主讲澧阳书院。二月，葬莫江公于南竹山之阳。夏，伯父羨周公修小淹石路竣工，公为文立碑。

嘉庆十三年戊辰，三十一岁。

是岁，仍主讲澧阳书院。夏，归里。秋，携眷赴京。辑丁卯、戊辰诗为《江湖草》。

嘉庆十四年己巳，三十二岁。

是岁，充国史馆编修。 九月十九日，适周氏妹姍英卒。 是岁，弟潛入县学为弟子员。 辑是岁诗为《太史草》。

嘉庆十五年庚午，三十三岁。

五月，充四川乡试副考官。 公在蜀登览山川，访察利病，著有《蜀輶日记》。 是岁有《题李香畬师诗集从军西诗》，师极鉴赏焉。（师讳方谷） 有《庚午科乡试录序》。 辑是岁诗为《皇华草》。

嘉庆十六年辛未，三十四岁。

正月十一日，子春福生，数月即殇。 冬月，三十四岁初度，彭宝臣、何仙槎、聂蓉峰、贺耦耕、谢心兰同集印心石屋，有赋得盆松，用二冬全韵诗。 是岁，有《巡幸五台山赋》。 有黎光地《云肤山房诗集序》。 侄亲贤生。

嘉庆十七年壬申，三十五岁。

七月十五日，弟子晋卒，年三十二。 冬月，三十五岁初度，彭宝臣、何仙槎、林敏斋、杨玉泉、唐镜海、贺耦耕邀游厂北山园，归饮印心石屋，有次李伯乔答示诸君诗。 是岁，有《帝京赋》、《送顾南雅侍读督学云南序》。

嘉庆十八年癸酉，三十六岁。

是岁，记名以御史用。 冬，黄夫人病危，女琼姿割腕疗母，乡里咸称焉。

嘉庆十九年甲戌，三十七岁。

三月，补江南道监察御史，充会试同考官。 有《题杏花日暖图》诗。 九月，奏湖南山田旱歉情形，请旨飭查，预防滋生事端。 十月，奏请禁吏部重签名目折。 十一月，奉命巡视中城，并于厅堂撰联以自警。 又条陈三急五

宜，缉捕皖豫等省红胡子匪徒。十二月，奏陈各省州县积弊，请悉予裁革。

是岁，与同时诸君子倡建悦生堂于京师朝阳门外，以收养穷民。江南大饥。有《谷日次贺耦耕》诗。

嘉庆二十年乙亥，三十八岁。

正月，奏请复考试教习旧例。三月，调陕西道监察御史。四月，迁户部给事中。九月，奉命巡视江南漕务。

是岁，有《登泰山题三天门》等诗。女静娟生。

嘉庆二十一年丙子，三十九岁。

二月，奏陈镇江运河事宜。六月，视漕事竣返京。有漕运裨冰图并诗。八月，充顺天乡试内监试官。转授吏科给事中。是岁，刻蕙江公诗文集并《印心石屋诗钞》于扬州。《印心石屋诗钞》即公自辛酉至庚午所著之《出山草》、《玉堂草》、《江湖草》、《太史草》、《皇华草》。时朝鲜使臣权永佐等得读公诗，咸求请益，归国，并筑拟陶书屋，结社联吟。

嘉庆二十二年丁丑，四十岁。

是岁，充会试内监试官。邑人公举蕙江公崇祀乡贤祠。女琼姿卒，乡里嘉其懿行，为之请旌。有《十一月二十二日梦中得“古驿梅花远送驼”句，醒足成之》、《咏雪诗》。

嘉庆二十三年戊寅，四十一岁。

三月十二日，长女瑞姿于归湘潭周诒朴。四月，俸满，记名以道员用。秋，戊寅科顺天乡试，奉命以道员用。十月，巡视东城。

是岁有《黄夫人四十生日诗》、《拟上陵歌二十章》。

嘉庆二十四年己卯，四十二岁。

是岁冬，授四川川东兵备道，政声最著。总督荐其治行

为四川第一。冬，乞假省墓。

是岁，以贺夫人所生女静娟字益阳胡文忠林翼。

嘉庆二十五年庚辰，四十三岁。

是岁，仍在川东兵备道任所。三月，力主官盐减价以靖私贩之议。十一月，擢授山西按察使，川东士民攀辕走送者数十里不绝。

是岁，有《小除过资阳示李石梧诗》、《成都守岁诗》。

有《渝城育婴堂捐册序》、《渝城体仁堂新刻总簿序》、《曾生墓碣》。

宣宗道光元年辛巳，四十四岁。

三月，接受山西臬篆兼署布政使。八月，调任福建按察使。十月，入觐。擢授安徽布政使。是岁有《元旦成都祝圣恭纪诗》、《为顾南雅题苍山试院映雪校文图诗》、《过徐州诗》、《过蠓矶灵泽夫人庙诗》、《宿州登高皇山诗》、《桐城道中诗》。

道光二年壬午，四十五岁。

是岁，在安徽布政使任所。七月十一日，子慧寿生。冬，大雪。

道光三年癸未，四十六岁。

正月，复大雪。擢安徽巡抚。有奏请太平、宁国、旌德三县漕米，改由司库采办，以杜借垫之弊。三月，复奏清查皖省仓库亏空情形，并拟追补章程。四月，截留暹逻国通事购置内地幼稚子女。六月，皖省大水，沿江州县多成泽国，公乘舟遍勘，劝捐拯灾，民不流亡。徽民建“旬宣康保”之坊，以纪公德。又奏请颍、亳、宿三州地方紧要，必须添设官兵，移驻文武员弁，以重巡防。七月，奏请前明太学生许文瑾、郡庠生许文玠、子生佳人祀忠义祠。八月，会同总督筹议皖省各属被水事宜。十一月三十日，

适周氏女卒。十二月，奏请元故行军千户沈寿三并其长子沈宏、次子沈度入祀忠义祠，其妻王氏旌表节孝，给银建坊。

是岁，重建刘猛将军庙。有《题当涂青山西北麓李太白墓过吊诗》、《答贺耦耕萝访诗》。

有《告安徽城隍神疏积水文》、《水灾告江神文》、《告刘猛将军文》、《祭周氏女文》、《长女瑞姿墓志铭》。

道光四年甲申，四十七岁。

巡抚安徽。四月，奏请前明四川嘉定州知州朱仪及子命锡入祀忠义祠，其妻胡氏旌表，给银建坊。六月，编设皖省棚户保甲，以防奸民杂处，滋生事端。七月，宿州、怀远大蝗。又，七月，奏请前明副将马应魁、汪思诚入祀忠义祠。冬，江苏高堰溃决。是岁，筹濬湖堤，以兴水利。重修大龙山祠宇，并建孚泽亭，立碑为记。子育麟生。有《宿州刘猛将军显应碑记》。

道光五年乙酉，四十八岁。

巡抚安徽。正月入覲。三月，履勘淮河，并设法筹款浚沿湖各湖(?)，以兴修皖省水利堤防。四月，奏请创修安徽省志，至九年二月，安抚邓廷楨督办葺事，总二百七十卷。五月调江苏巡抚。有奏安徽劝设义仓并议定章程，请飭遵行。是时，高堰溃决，河淮交病，漕运中阻。公奏请海运，亲筹商船，力辟陈议。事毕，节省银米十余万，为东南拯弊首策。有筹办海运晓谕商船告示。六月，有覆奏筹议海运折，漕停运治河情形。又奏请仿照唐代转运之法，临淮沿河建仓。七月，筹款饬缴凤、颍、泗三属民人凶器。又奉命覆勘黄茆工程，亲赴上海招集海运商船。十二月，疏陈筹议海运事宜。

是岁，有《重修安化县学宫碑记》。

道光六年丙戌，四十九岁。

巡抚江苏。二月，公亲至上海督办海运，并奏陈海运图说。有《海运初发诗》。又奏请收买沙船余米，俾期迅速以利漕运。三月，奏请严惩徐邳淮海匪民，以挽颓风而安良善。四月，奏请飭催沙船以速海运。又，会同江督奏请将积年缓带漕米留备民食。五月，奏请前明高攀龙从祀文庙。是月，祀李、杜、白、苏四公于吴中，述事纪诗。六月，勘修苏州府城。又，复至上海督办二次海运，事竣，奉谕优诏褒美，赏戴花翎。七月，勘水淮扬。

十月，奏陈灾区利害，请速堵减(?)坝，以安灾黎。又，奏请筹办收养江北被水灾民，并筹议劝捐章程。又，奏请禁帮船加索津贴，并酌拟调剂旗丁。十一月，奏陈办灾积弊情形及除弊四法。又，奏请严禁衿棍包漕横索陋规。又奏请将漕船改由丹徒横闸出江。是岁，筹议开京口河，金云不可，公力排众议，卒成其事。冬，大雪。有《海运告海神文》、《海运告风神文》、《海运告天后文》、《海运告龙神文》、《海运再告海神文》、《丹徒越闸金龙四大王庙碑记》。

道光七年丁亥，五十岁。

巡抚江苏。正月，复奏现办漕运情形。三月，重建尹山桥，至九月竣工。五月，奏苏省办漕毋庸另定收数。

七月，奏请旌表武进、阳湖两县贞节妇女共三千一十八口，并建祠及坊，以励风俗。八月，会同总督酌议新增海运章程。十月，会同江督、漕督，议复海运章程八条，欲永苏三吴漕困，因会议中止未竟。又，会同江督筹议挑浚吴淞江，至次年三月竣工。又，覆奏苏省钱漕，查禁帮费陋规。十一月，覆奏查议挑办徒阳运河章程，并筹议修筑练湖隄闸，以利漕渠。是月三十日，公五旬生日，谢元淮、

李葛峰等有祝公诗序。是岁，与潘三松奕隼、韩桂龄崱、石琢堂韞玉、吴玉松云号为沧浪五老，并绘图纪胜。重修沧浪亭。有《苏郡名贤像刻序》、《严乐园墓志铭》。

道光八年戊子，五十一岁。

巡抚江苏。正月，官军生擒回匪张格尔，西域底定。

二月，建震川书院于嘉定安亭菩提寺侧。二月十七日，挑濬吴淞水道竣工，由是沪渎直达，沙无可壅，田可耕植，沿图耆庶，咸称百余年来未有若是开挖深通之工。工竣，赋长歌以纪其事。三月二十九日，子恩寿生。（卢孺人出）

九月，奏请将新涨沙洲归公，杜讼。十一月，莅京口，勘视河道，有诗纪事。又，会同江督筹议借巢缓漕摊征还款，挑濬浏河，部议未允。是岁，绘鸿雪因缘图成，纪游迹也。又，沧浪园新建高士祠成。

道光九年己丑，五十二岁。

巡抚江苏。二月，《安徽省通志》成，以此书由公创修，下部议叙。又，会同江督筹议，奏请借动银款，修建练湖、黄金等闸水利要工，得旨于三月十五日起工，于六月十七日告成，并撰碑记。七月，验收徒阳运河、黄金、张官闸座。十一月，入觐。是岁，与顾南雅、朱兰坡、朱詠斋、吴棣华、梁菡林、卓海帆号为沧浪七友，并刻石沧浪园。有《铁铃关文星阁碑记》。

道光十年庚寅，五十三岁。

巡抚江苏。五月，梟犯黄玉林带同伙犯伍步云等八名赴官自首。六月，严查回空粮船夹带私盐。又，缉获户部假照要犯任开宇（本传作松字）、刘东昇解京。诏加太子少保銜。两江总督蒋攸钰因病乞假，公遂兼署两江总督。是月，贲胡文忠公林翼于桃花江别墅。八月，实授两江总督兼署江苏巡抚。转调卢坤为江苏巡抚。又，奏筹挑濬

河、白茆、清水、长河。又，覆奏安置投首巨梟黄玉林等情形并淮盐鹺弊端。九月，覆奏筹办巨梟黄玉林等情形，并奉谕将蒋攸钰等以屡次降旨，未能查明该犯，因循敷衍，著交部议处。又，奏筹办私梟及回、倚各匪情形。是月，勘视洪泽湖堰圩隄工。十月，奏陈淮鹺积弊，并请删减浮费。十一月，筹款兴挑孟渎、得胜、澡港三河。十二月，会同钦差王鼎、宝兴筹议课归场灶及两淮盐务疲弊情形，并拟定肃鹺章程。钦差王鼎等复密奏请裁盐政，归总督管理，以一事权。是岁，辑抚吴以来诗草为《抚吴草》。

辑历年修治江苏水利及新涨沙洲归官书牒为《水利七案》。
(附系于此)

卷 下

道光十一年辛卯，五十四岁。

总督两江兼两淮盐政。正月，两淮盐政归两江总督管理，公于是专心一力，厘除积弊，其大端著有成效者四。是月，奏举江宁府知府俞德渊署两淮盐运使。二月，奏缴盐政养廉，并裁盐政浮费。又，筹议加斤减价，兼疏积引，经户部据奏，四月奉旨依议。又，札委勘估挑濬仪河，以利益盐运。三月，奏拟盐务人员改补调署章程。又，捕获盗匪、倚匪，分别惩办。四月，会同总河，恭报漕运二进漕船渡黄完竣。五月，会同总河总漕，恭报重运漕船全数渡黄完竣。又，奏淮北商力积疲，请借项官督商运。六月，大水。公筹拯济江淮各属灾民。七月，奏命偕程祖洛筹办江苏灾赈，并借张井勘办漫口堤工。八月，奏陈岸盐广销，并严拿倚匪多起。又，奏陈江苏办灾情形，并酌拟章程，率属筹办。九月，议准运商窝单，即令照窝行运，

不必官为定价，如本商力绌，准其售与新商认运，不准转卖与不行盐之人。倘该商于开纲后，并不投滚办运，又不退与新商，即由运司提窝改签。是月，子慧寿殇。十二月，覆奏课归场灶之说，未敢遽行。并筹划各盐务条陈。又，奏请淮北滞岸，试行票盐。是岁冬，纳妾张氏。又，是岁勘河常熟、白茆，建二忠祠于拂水岩，即明末瞿忠宣公式耜及张公同敞，并访得瞿公后人祥顺，奉祀公祠，以彰忠烈。有覆王垣夫先生书，述历年治事情形，并论时政甚详。

有《拯灾劝捐告示》、《为水患告江海神文》。

道光十二年壬辰，五十五岁。

总督两江兼两淮盐政如故。正月，请委专员，经理票盐。二月，奏请淮南奏销展期，并察看淮北未尽事宜。三月，覆陈查禁艚船因灾带私，实无设立马头及屯户过载等名目，并前后设法查禁各情形。四月，奏定江西堵缉粤私章程。又，奏回空船宜严行查禁夹带私盐，并饬堵川私、潞私。是月，巡历海州。有《登东海云台山诗》，属而和者数百人，乃汇为《印心石屋书荟》。又，是月二十六日，子祐元生。五月，酌议淮北滞岸，试行票盐章程。又，附奏票运、商运之外，仍酌运官盐。六月，有委员官运倡导札及通饬浮议阻挠札。八月，奏请复设盐政，以专职守，未许。公乃竭力振刷锢弊，裁浮费、革蠹商，曩昔之坐食千金者挟怨诅咒，然卒能利国利民而为后世法。迄今扬俗犹有岁除伐桃树颓风，盖当时蠹商怨公之深，于此可见。

九月，桃南所属奸民，偷挖官堤，公以兼辖河工，未能预防，自请议处。闰九月，奏饶州府岸销疲惫，请援照成例，将饶岸额引改摊通岸纲店，有力之家，一体带运，无须专商，奉谕依议。又，会同钦差穆彰阿、张井会勘筹办河湖运道。是月初九日，子枕生，初名佑魁，字少云。十一

月，奏请壬辰纲、宁国筹食盐二十三万余引，全行融楚。又，会同钦差敬征复奏体察淮北票盐情形。是月，以缉私赏银五千两，创建江宁丰备仓于石城门街。又建广丰备仓于罗寺湾。是岁，重建海州海曙楼。有《蟠龙丈人歌》、《登钟阜小茅山祈雨报谢诗》、《壬辰科校录皖省遗才偶成诗》。

道光十三年癸巳，五十六岁。

总督两江兼两淮盐政如故。正月，奉谕严缉挖堤首犯陈端等。二月，奏销辛卯纲票运、商运盐课。又，奏淮北票盐试行有效，请将湖运各畅岸推广办理，酌定章程，以裕课便民。又，奏请樊办理淮北票盐委员，前署海州事升用同知直隶州知州坐补江都县知县伍家榕，免其坐补，即行升用。金坛县县丞谢元淮、海州州判龚照琪，以应升之缺尽先升用。候补盐经历孙玉树、候补从九品孙丰、候补盐知事孙绍恒，各以本班，尽先补用，俾昭鼓励。奉谕依议。四月，孟渎、得胜、澡港三河挑濬竣工，并于孟河底挑出江船一只。五月，议复纹银出洋，请明定例，永远遵行，从之。六月，奏洪泽湖地方紧要，移设都司专营，以资巡防。八月，奏请停止淮南加带己庚残引。又，议复地方官筹款运盐及按户派销之法，断不可行。又，奏回空粮船，未便任带芦盐，致使盐漕两误。又，再陈回空粮船，未便任带芦盐。十月，奏粮私最为淮纲之害，宜以缉私为最要。又，再陈回空粮船，未便任带芦盐。是月，缉获盗决官堤首犯陈端。又，是月由蒋家坝渡洪泽湖，登老子山，相度移设水师营地。十一月，会同浙闽督抚、苏抚，筹议堵截淮私章程，以卫浙盐。又，筹议巡洋会哨章程，以肃洋政。是岁有《偕同事游龟山访禹迹次李兰卿韵诗》、《龟山览古诗》。有《婺源县重修文庙碑记》、《钟山书院

课艺诗》、《三省水灾劝捐告示》。

道光十四年甲午，五十七岁。

总督两江兼两淮盐政如故。 正月，以两淮鹺务日有起色，加恩议叙。 二月，会同苏抚筹办苏淞等属漕务。 又奏销壬辰纲票运、商运盐课。 又，奏委海州王用宾总办票盐事务。 又，奏请奖叙督办票盐降调署运司道员王凤生、降调道员邹锡醇，奉谕著俟病痊后送部引见，再降谕旨。 又，奏请奖办理票盐江苏改补知县王澄、试用盐知事陈庆恒，临兴场大使王汝锬、试用盐经历冯鼎祚、试用批验所大使程松。 奉谕王澄、陈庆恒各以本班尽先补用，王汝锬、冯鼎祚，程松俱著交部议叙。 三月，开濬浏河、白茆河，并建石坝涵洞，至五月竣工。 又，奏停止淮北商盐借马，以重课款。 五月，批准安庆岸盐销滞，将癸巳新盐五万一千九引拨摊楚西各岸融销。 八月，重修金陵朝天宫落成，并撰碑记。 是月，办理盐务总局王用宾复署镇江府知府，调委上元县知县保先烈接办，并委金坛县县丞谢元淮帮同办理。 十一月，东台等七场商人，陈请挑濬青浦阁至海道口运盐河道。 十二月，奏请洪湖营添设弁兵，以重巡防。 是月，御史许球奏两淮盐务办理支饬情形，当降旨交部，查覆具奏。 是岁，海州人士新修华严阁，明年夏四月，奉公行相于此。

道光十五年乙未，五十八岁。

总督两江兼两淮盐政如故。 正月，缕陈历年办理两淮鹺务情形。 又，奏销癸巳纲票运、商运盐课。 又办理盐务总局保先烈，因部议革职，另委高邮州知州之(?)太湖同知刘大烈接办。 又，奏请变通巡江章程，以杜江船盗卖夹私诸弊。 又，奏再请停止加带己庚残引。 是月，委员谢元淮、分司童濂，陈请于淮西坝顺清河设卡验票截角，使票法肃清，私贩杜绝。 又，筹修省城秩祀基宇并御碑亭。 四

月，有严禁沿途匪棍扰累示。是月，重历海州。六月，奏南场垣盐不敷捆运，暂运北盐接济。又，有票盐由场局收垣发贩章程告示。又，有票盐简明章程告示。十一月，复奏淮盐五百斤出场并无弊混。又，奏淮南盐多滞销，请援案将乙未新纲分年带运，以利疏销。是月，奏请修葺明孝陵。是月十一日，入覲，请假回里修墓。上询及里居，乃书“印心石屋”匾额赐之。又，奏请复盐政未许。十二月，有筹议约束水手办理章程。又，奏销甲午纲票运、商运盐课。又，奏淮南乙未纲引课，仍请分带。是岁，飭令盐属劝储仓谷，以备荒年。有《题海州宿城仙人屋诗》、《题海州留云岭诗》、《重登云台山诗》。

道光十六年丙申，五十九岁。

总督两江兼两淮盐政如故。二月，奏请安徽颍州艾亭集酌改守备，移拨兵丁，以资巡缉。又，复奏出场盐包实已按引裁减。五月，修理扬城文庙，明年十二月竣工，并请奖叙各员。七月，赴皖赣校阅营伍。又，严禁八滩等处票盐转尖入黄示。八月，侧室张氏卒。九月，奉命飭查各州县棚民，以免滋生事端。是月，回籍修墓。十月，给事中鲍文淳挟嫌奏公私刊奏疏，并票盐不善，得旨降四级留任。十一月，会同两湖督抚讷尔经额、周之琦、裕泰等筹议楚省鹺务缉销。是岁秋，有摹绘《印心石屋图说》八帧进呈。是岁，海州云台山新建陶靖节先生祠。

道光十七年丁酉，六十岁。

总督两江兼两淮盐政如故。正月，办理盐务总局刘大烈因署理镇江府知府，调委无锡县知县谢元淮接办。又，奏销乙未纲票运、商运盐课。又，汇报浙盐引地缉私情形。二月，奏准废止淮北行盐各州县考覈以归核实。是月二十九日，两淮盐运使自缢逝世，陆荫奎继之，并陈淮鹺

各事掣肘情形。 九月，以河库道李湘菴款目不清，降四级留任。 十月，奏清将淮南悬引融运淮北，奉旨依议。 又，准依湖广总督咨，以湖南永顺苗盐归纲领运，以昭核实。 十一月，公六旬生日，御书“绥疆锡祐”之额及福寿字，并寿品十种以赐。 是岁，建敦善书院于海州板浦场院，初名天池，更名郁州。敦善之名，因陶靖节先生昔尝过此，取陶诗“匪道曷依，匪善奚敦”之句而易之也。 又，是岁，识左文襄公宗棠于湖南醴陵县，一见目为奇才，极激赏之。 有《石琢堂墓志铭》、《赵琴士墓志铭》。

道光十八年戊戌，六十一岁。

总督两江兼两淮盐政如故。 正月，奏销丙申纲票运、商运盐课。 二月，复奏筹议稽察场灶章程。 又，奏请河右营、王家集等处添移弁兵，扼要驻巡，以裨地方。 又，奏请淮北仍按原额造报，将票盐溢课一并协贴淮南。 是月，患手足痿弛。 三月，两淮盐运使陆荫奎丁忧，奏荐河库道沈拱宸升署。 四月，复奏查核上海会馆并无囤贮私盐，暨舟山地方产盐应归浙江经理。 又，是月，左手左足忽中风痹，起居不便而神明不衰。 五月，会同苏皖两抚，复奏招商贩米由海运京收买，不无流弊，惟官运尚可行于丰年。 七月，筹议严禁鸦片章程。 九月，奏泰州分司所属伍祐、新兴二场，丈出新淤沙荡共升课银八百五十八两九钱五分一厘。 十月，起获烟土甚巨，得旨获奖。 十一月，奏请淮南戊戌纲援案提出二十二万引，融运淮北。 十二月，筹奏沿海港汊村庄设法编查章程。 是月，喉干咽苦，饮食少进。 是岁，置博山园于江宁龙蟠里四松庵址。 又，建惜阴书舍于盩山园侧，并祠陶桓公、陶靖节，惜阴之名即秉桓公之教。 公歿，建祠书院以祀之。（按：院即今江苏省立图书馆，馆内有景陶堂，虽屡经兵燹，迄今栗主犹存）

道光十九年己亥，六十二岁。

总督两江兼两淮盐政如故。正月，头脑眩晕，动辄昏绝。是月，奏请奖励经理票盐两淮海州分司运判童濂、板浦荡大使帅宗榆、试用大使张梓林。奉谕童濂著加恩赏加五品顶戴，以应升之缺升用；帅宗榆著遇有应升知县缺出，尽先升用；张梓林著不论班次，遇缺尽先补用，以示鼓励。又奏销丁酉纲票运、商运盐课。又，奏淮南戊戌悬引仍请融运淮北。二月，屡复眩晕，喉管喷血，遂疏开缺。三月，以病免，调林则徐督两江。有兼理盐政八载情形奏。公自兼理盐政八载以来，敌私除弊，变纲行票，遭谤议，任艰巨，卒能化梟为良，裕课便民，而为后世筹国法，于此奏可以概见。六月二日，薨于位，加赠太子太保，予谥文毅，敕建专祠。十一月二十三日，恩准淮北建立专祠，并祀名宦祠。明年六月初三日，恩准崇祀海州儒学名宦祠，又特允入江苏名宦祠，不交部议。公歿后，乡里多有视其孤弱而欺侮者，左文襄公宗棠、贺公熙龄、胡文忠公林翼为区划其家事以安之。公虬髯山立，洪音瑰辩，遇事勤敢，不避嫌怨，廉而不刿，严而不苛，以竭其智能，以谋国家之利，隐然为一朝砥柱。政事之余，尤嗜风雅，诗歌书法，无不潜究，故撰著甚伙。有遗诗未刊入集者。配黄夫人，侧室贺、张、刘、卢、杨、张。子八：春福、曼珠、普陀保、葆贤，贺孺人出；育麟，刘孺人出；恩寿、祐元，卢孺人出，均殇；枕，张孺人出，赐主事。孙文熊，葆贤嗣子。曾孙应晓。女七，湘潭周诒朴、安化王育耀、长沙彭申甫、善文贺珏、益阳胡林翼、衡山聂有湖、善化陈庚泽其壻也。子枕，恩赏主事候选道，为左文襄公壻，受读于公者八年。

金陵城西，盩山之麓，崇楼杰宇，蔚然而深藏者，国学图书馆也。馆故惜阴书舍，清道光中陶文毅公所创以课士者，今百有十余年矣，公之粟主犹存。馆内有景陶堂、陶风楼，流风余韵，久而未泯。方公之督抚两江也，创海运，修水利，倡票盐，兴利祛弊，动关天下大计，犹以余力，兢兢于讲学课士，以兴起斯文。大贤之措注，固非俗吏所能测哉！

戊辰之春，余始获侍劬堂柳先生于盩山，得公所以为人者，不觉肃然以敬，穆然而怀。爰取公集读之，间刺取行事，参稽载籍，逐年排纂，遂成斯谱。岁丁丑，尝寄从兄驾吾正之，未及厘订，倭夷入寇，藏书尽失，谱之存亡不可问矣！乙酉冬，余复以柳先生之招，清点馆籍，得斯谱初稿，大喜，乃抽暇续成之，柳先生时时为订正焉。凡公律己治事之迹，略可见矣。程子有言：一命之士，苟存心于济物，于人必有所济，况任天下之重而有不能使斯民被其泽者乎！阅斯谱者，观公之用心，有以知其成功之名非偶然也已。

戊子冬十二月南通王焕镛说之甫
识于盩山国学图书馆之衡山寄庐

